

Ekspoze Edin Ćulov

Poštovani,

predsjedavajući Skupštine, zamjenici predsjedavajućeg Skupštine Bosansko-podrinjskog kantona Goražde, poštovani poslanici, ministri, mediji, načelnici opština, uvaženi gosti, državni službenici i namještenici, poštovani građani Bosansko-podrinjskog kantona Goražde, dame i gospodo,

zahvalan sam na ukazanoj prilici da vam kroz današnji Ekspoze iznesem osnovne principe djelovanja i prioritete rada Vlade Bosansko-podrinjskog kantona Goražde zasnovane na Programskoj platformi koalicije. Osjećam pozitivnu energiju, želju i potrebu svih nas da ubrzamo postojeće aktivnosti, primijenimo nove i bolje, predviđene u Programskoj platformi koalicije.

Dozvolite mi da se kratko osvrnem na prethodni period postojanja i razvoja Bosansko-podrinjskog kantona Goražde. Poznato nam je u kakvom smo se stanju nalazili i šta smo sve preživjeli, od potpuno devastiranog Kantona postali smo heroji otpora i čudo privrednog razvoja. Uspjeli smo, svi zajedno, brzo dostići određeni napredak u svim segmentima. Postali smo prepoznatljiv Kanton u Federaciji Bosne i Hercegovine, primjer dobrog poslovanja i saradnje na svim poljima, ali određeni period svjedoci smo stagnacije i odlaska naših građana usljed nepovjerenja, nepravde, nezadovoljstva i siromaštva. Ovaj trend potrebno je promijeniti, svim snagama "moramo," svi zajedno ići naprijed.

Nakon završetka rata demobilisani borci su prepuštani sami sebi, potrebno je pružiti pomoć demobilisanim borcima i njihovim porodicama u potrebi. Neophodne su detaljne analize rada svih Boračkih udruženja koja se finansiraju ili sufinansiraju iz Budžeta Bosansko – podrinjskog kantona Goražde, unaprijediti rad na umrežavanju i komunikaciji između kantonalnih ministarstava u Federaciji BiH kao i sa drugim nivoima vlasti, popraviti stambene objekte pripadnicima boračkih populacija u potrebi, poboljšati uslove prijevoza pripadnika boračke populacije kako do Sarajeva tako i do banjanskih liječilišta. Prilikom dodjele sredstava po javnim pozivima odobravati one projekte od kojih korist ima što veći broj krajnjih korisnika, prema mogućnostima sufinansirati djecu boračke populacije za II i III ciklusa studija, nastaviti sufinansiranje i zapošljavanje djece šehida i boračkih populacija, izgradnja spomen obilježja i rekonstrukcija postojećih na lokacijama na kojima to do sada nije urađeno a potrebno. Omogućiti djeci boračke populacije, prvenstveno djeci šehida i palih boraca obavljanje pripravničkog staža ili volonterskih radova u saradnji sa cijelom Vladom BPK.

Svima nam je jasno da je povjerenje u politiku i političare poljuljano, da građani Bosne i Hercegovine pa tako i našeg kantona ne vjeruju političarima. Svi mi ovdje kao i Vlada, smo u službi građana i moramo raditi za dobrobit građana Bosansko-podrinjskog kantona Goražde. Građani ovog kantona trebaju daleko bolje i zadovoljnije živiti. Naučio sam da nema izgubljenih utakmica, a ova Vlada je jedna kvalitetna ekipa, ekipa sastavljena od mladih i hrabrih ljudi i tim koji je odlučio da pobjedi. Nastojat ćemo napraviti sveobuhvatnu reformu poslovanja Vlade Kantona, prije svega povećati transparentnost, otvorenost prema građanima, uvođenjem novih savremenih formi kancelarijskog poslovanja. Naš kanton mora biti atraktivan prostor za život i suživot svih ljudi dobre volje. Građani Bosanskog podrinjskog kantona Goražde su zaslužili i trebali bi da imaju najbolje životne uslove u Bosni i Hercegovini. S tim u vezi moramo izgraditi kvalitetnu i efikasnu javnu upravu uvođenjem informacionih tehnologija i elektronskog sistema kancelarijskog poslovanja koji bi podigao efikasnost rada u službi građana Bosansko-podrinjskog kantona Goražde.

Prioritet ove Vlade je uspostaviti pogodno privredno okruženje, dinamičnu privredu i nove projekte zasnovane na prirodnim resursima i poslovnoj tradiciji, učiniti Bosansko-podrinjski kanton Goražde mjestom kvalitetnog življenja, osigurati održivo upravljanje okolišem, jačati infrastrukturne kapacitete našeg Kantona (tunel Hranjen- izvršiti uvid u projektnu dokumentaciju kao i obaveze Kantona, aktiviranje izgradnje zaobilaznice u gradu Goraždu, uređenje poslovnih zona, evaluacije stanja vodovodne i kanalizacione mreže sa adekvatnim rješenjima u skladu sa nadležnostima Kantona, itd). Pitanje razvoja infrastrukture, je također pitanje kojem ćemo se posebno baviti. Nastaviti sa projektima energetske efikasnosti osnivanjem javnog preduzeća za proizvodnju energije (solarne i vjetro elektrane), proizvodnju peleta (u okviru JP Bosansko Podrinjske Šume ili drugi modalitet) i mogućnosti otkupa, prerade voća i povrća u okviru javnog preduzeća i/ili zadruge, joint venture ili nešto slično. Isto tako, poduzeti sve aktivnosti koje imaju za cilj konačno i sigurno obezbjeđenje pitke vode, planirati proizvodnju u agraru a plasiranje tih proizvoda nezamislivo je bez akreditirane laboratorije na našem području.

Neophodno je obezbjeđiti efektivan poticaj u poljoprivrednoj proizvodnji, pokrenuti sve aktivnosti na obezbjeđivanju pijačnog prostora u Goraždu (rok od 6 mjeseci), omogućiti i dogovoriti, prema potrebama, goraždansku pijacu odnosno pijačne tezge u Sarajevu kao i ispitati mogućnosti otvaranja stočne pijace na prostoru Bosansko podrinjskog kantona Goražde. Dodatan akcenat bi trebao biti planiran na podsticaj u domenu turizma, plasiranja agrarnih proizvoda i ugostiteljstva putem uvođenja HACCP sistema što je nezamislivo bez akreditirane laboratorije. Stvaranjem pozitivnog ambijenta za življenje građana Bosansko-podrinjskog kantona Goražde stvaraju se osnovni preduslovi za neophodni razvoj turizma.

Isto tako, Vlada će provoditi sve aktivnosti u cilju stvaranja uslova za rast privrednih aktivnosti i postizanja održivog ekonomskog razvoja što će direktno pozitivno uticati na povećanje prihoda i održavanje dugoročne finansijske stabilnosti. Najznačajnije aktivnosti će se poduzimati na adekvatnom restrukturiranju rashoda, povećanju javne potrošnje, odnosno poboljšanju životnog standarda. U isto vrijeme će se poduzimati aktivnosti u cilju pozicioniranja Kantona u sistemu raspodjele javnih prihoda, te aktivnosti koje bi za posljedicu odnosno ishod, trebale imati veću kontrolu nad dosljednom primjenom postojećih propisa kojima se uređuje pitanje ostvarivanja prihoda, kao i izvršavanja rashoda iz budžeta.

U domenu socijalne politike, briga o socijalno osjetljivim kategorijama biće jedan od prioriteta ove Vlade. Generacije u trećoj životnoj dobi koje su gradile, a zatim i branile ovu državu zaslužuju bezbrižno starenje. Također, svi mlađi građani našeg Kantona koji zbog zdravstvenih razloga nisu sposobni samostalno privređivati ne smiju zbog toga biti u stanju siromaštva i mi kao društvo dužni smo sistemski brinuti o ovim kategorijama. Nastavit ćemo sa aktivnim mjerama pronatalitetne politike, kako kroz propisane naknade majkama porodiljama, dječijim doplatkom, tako i drugim mjerama. Pitanje nataliteta i sprečavanje odlaska mladih nije samo pitanje socijalne politike, već stvaranje boljeg životnog ambijenta u svim segmentima, od boljeg standarda radnika, boljih puteva, boljeg obrazovanja i generalno boljeg standarda života u svim segmentima, od stambenog zbrinjavanja, zdravstvene zaštite, kulture, sporta, te svih ostalih sadržaja koji utiču na kvalitet života.

Vlada mora dati svoj maksimum za vraćanje povjerenja građana u naše zdravstvo, moramo se intenzivno posvetiti kadrovskom jačanju i boljoj opremljenosti naših zdravstvenih ustanova što će rezultirati većim brojem i kvalitetom zdravstvenih usluga. Prvenstveni zadatak je zadržati postojeći medicinski kadar izjednačavanjem njihovog životnog standarda sa drugim sredinama, a uporedo s tim raditi na kadrovskom jačanju. Modernizacija sistema obrazovanja je kontinuiran proces i svakako zaslužuje pažnju u vidu infrastrukturnog poboljšanja uslova u školama, razvoja sistema nastave i praćenja kvaliteta sistema stipendija, pojačanim uključivanjem socijalnih kriterija, kao i pitanjima daljeg razvoja predškolskih i visokoškolskih

ustanova. Kadrovsko jačanje podrazumijeva plansko, kontinuirano i finansijski podržano stručno osposobljavanje naših kadrova, putem specijalizacija, subspecijalizacija i svih drugih vidova edukacija. To je nešto duži proces, ali se trenutni kadrovski deficit mora brzo sistemski rješavati kroz saradnju sa zdravstvenim ustanovama izvan našeg Kantona. Kvalitetnim upravljanjem, kako zdravstvenim ustanovama, tako i Zavodom zdravstvenog osiguranja, obezbjediti da se sredstva osiguranika troše racionalno, transparentno i na zadovoljstvo korisnika usluga. Prosvjetni i zdravstveni radnici moraju imati svaki vid podrške jer su oni stubovi ovog društva.

Godinama slušamo o „održivi povratak“, ali u praksi to nije tako. Izbjegli i raseljenim osobama na području kompletne jugoistočne Bosne i Hercegovine vraćena je imovina ali za toliko spominjani održivi povratak nije dovoljno samo imati stambeni objekat. Za život dostojan čovjeka potrebno je stvoriti uslove da povratnici žive od vlastitog rada, imaju sigurnost, zdravstvenu zaštitu, da djeca imaju odgovarajuće uslove za obrazovanje, itd. Ova Vlada će akcenat staviti upravo na životna pitanja istinskih povratnika, a u drugom planu u odnosu na njih moraju biti „vikend povratnici“. Svjesni smo da je zbog pogrešnih politika mnogo novca i vremena pogrešno utrošeno a kao rezultat imamo vrlo mali stepen implementacije Anexa 7 Dejtonskog mirovnog sporazuma. Zbog svih žrtava koje smo dali, imamo obavezu da povratak prognanih mora biti obaveza kako ove tako i svih budućih Vlada, s tim u vezi posebnu pažnju ćemo posvetiti povratnicima u susjedne opštine kantona bez obzira na vjeru i naciju.

Vlada Bosansko – podrinjskog kantona Goražde će u okviru sveukupne reforme javne uprave nastaviti da podržava Odluku Skupštine BPK-a Goražde o zajedničkom izvršavanju nadležnosti sa Federacijom BiH za donošenje jedinstvenog Zakona o državnoj službi i Zakona o namještenicima na cijeloj teritoriji Federacije BiH, a sve u cilju ispunjenja jednog od 14 pitanja iz Mišljenja Evropske komisije o zahtjevu BiH za članstvo u Evropskoj uniji. Također, fokus Vlade Bosansko-podrinjskog kantona Goražde bit će usmjeren ka unapređenju kvaliteta efikasnosti i profesionalnosti zaposlenih u državnoj službi, kontinuirano ulaganje u obrazovanje i edukaciju zaposlenih, povećanja i nadogradnje postojećih kompetencija i vještina državnih službenika i namještenika a sve u cilju pružanja što kvalitetnije i transparentnije usluge građanima i pristupa javnim službama.

Nastavit će se i aktivnosti na antikoruptivnom opredjeljenju Vlade i Skupštine Bosansko - podinjskog kantona Goražde s ciljem jačanja povjerenja građana u institucije, gdje se planira osnivanje Agencije za borbu protiv korupcije, kojom se između ostalog uvodi institucionalna zaštita prijavitelja korupcije u institucijama Bosansko – podrinjskog kantona Goražde, što dovodi do veće transparentnosti u radu i borbi protiv korupcije.

Za unapređenje sigurnosti građana i imovine, potrebno je uspostaviti video nadzor nad svim frekventnim putnim pravcima, proširiti saradnju s drugim kantonalnim i svim višim relevantnim nivoima, uskladiti sve propise koje donosi Ministarstvo unutrašnjih poslova Bosansko-podrinjskog kantona Goražde kao i sve radnje Ministarstva i njegovih uposlenika sa međunarodno prihvaćenim principima policijske službe, unaprijediti saradnju policije i komesara Uprave policije, optimizaciju unutrašnje organizacije, stvoriti optimalne radne uslove za rad policijskih službenika, državnih službenika i namještenika, obezbijediti sredstva za kontinuirane edukacije i profesionalno usavršavanje uposlenika i povećanje efikasnosti, efektivnosti i ekonomičnosti uposlenika Ministarstva, a u skladu s pozitivnim praksama, zakonskim i podzakonskim propisima kao i svim drugim aktivnostima koje su neophodne.

U okviru Ministarstva za urbanizam, prostorno uređenje i zaštitu okoline Bosansko-podrinjskog kantona Goražde potrebno je izraditi Studije sa programom razvoja informacijskog sistema o otpadu na području Kantona, kako bi se obezbjedili tehnički preduslovi za početak uvođenja adekvatnog sistema upravljanja otpadom. Uspostava jedinstvenog prostornog informacionog sistema (GIS-a) koji ima za cilj prikupljanje, korištenja

i obradu podataka od značaja za planiranje, uređenje, korištenje i zaštitu prostora. Poboljšanje energetske efikasnosti građevina će uticati na smanjenje zagađenja, efikasnije iskorištenje energija te smanjiti negativan uticaj na životnu sredinu.

Unapređenje u ekologiji kroz približavanje evropskim standardima radi kreiranja uslova za održivo korištenje prirodnih resursa, unapređenje upravljanja životnom okolinom i sprječavanje njenog onečišćavanja kroz promjene zakonskog, upravljačkog, finansijskog i institucionalnog okvira, te njegove integracije u druge sektore poput turizma, energetike, industrije, poljoprivrede, šumarstva, saobraćaja i slično. Ovim će se stvoriti potrebni preduslovi za sprječavanje, nadzor i postupanje u pravcu smanjenja zagađenja zraka, tla i vode, racionalno korišćenje prirodnih izvora i energije na najpovoljniji način za životnu sredinu. Nastaviti kontinuiranu saradnju sa nevladinim sektorom i unaprijeđenje saradnje sa lokalnim zajednicama kroz sufinansiranje projekata iz nadležnosti rada Ministarstva koji se po javnim pozivima dostave na adresu Ministarstva, sa posebnim naglaskom na projekte iz oblasti ekologije i zaštite okoliša.

Jačanje stambene politike kroz:

- stvaranje alternativnih mogućnosti za zadovoljavanje stambenih potreba,
- uvođenje prakse rješavanja stambenog pitanja putem neprofitno-socijalnog stanovanja za populaciju koja to ne može obezbijediti po tržišnim uslovima, kroz izdvajanje određenog broja stambenih jedinica sa kojima raspolaže Bosansko-podrinjski kanton Goražde za te namjene,
- izgradnja novih i uređenje već izgrađenih stambenih jedinica u društvenom vlasništvu i
- unapređenje stanja i oblasti kolektivnog stanovanja, regulisanje stambenih odnosa na način njihovog usklađivanja sa Zakonom o stvarnim pravima Federacije BiH.

Regulisanje imovinsko-pravnog statusa objekata u vlasništvu Bosansko-podrinjskog kantona Goražde. Od ukupnog broja objekata koji su u vlasništvu Bosansko-podrinjskog kantona Goražde dobar dio njih nema potpuno riješen status kako imovinsko-pravni (upis u zemljišne knjige), tako ni tehnički (odobrenje za upotrebu).

Na kraju ovog izlaganja ne mogu a da ne kažem, da tokom moje dugogodišnje karijere i rada u međunarodnim organizacijama na mnogobrojnim projektima širom naše Bosne i Hercegovine, stekao sam mnogo prijatelja dobronamjernih insana od kojih očekujem veliku podršku u implementaciji projekata za dobrobit našeg područja življenja. Molim sve vas prisutne, građane Bosansko –podrinjskog kantona Goražde, Bosne i Hercegovine, diaspore, sve ljude dobre volje bez obzira na stranačku pripadnost da podjele sa nama njihova znanja, najbolje prakse, koje mi ovdje ne posjedujemo, pruže nam odgovarajuće ideje, podršku i nesebičnu pomoć za obnovu, razvoj i istinski progres.

Poštovani zastupnici, poštovani građani, dragi moji prijatelji, hvala vam još jednom na datom povjerenju, prostoru i pažnji. Pozivam vas da zajedno radimo u interesu Bosansko-podrinjskog kantona Goražde, samo zajedno možemo uraditi krupne i kvalitetne stvari za Bosansko-podrinjski kanton Goražde

Malo nam je potrebno da svi budemo sretni...

Hvala vam!